

**Nunatta avataanut sioqqanik nioqquteqarsinnaalernissaq pillugu Naalakkersuisut UPA2020-mut iliuusissatut pilersaarummik saqqummiusseqqullugit peqqunneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Aqqaluk Heilmann, Atassut)

**Akissuteqaat**

(Aatsitassanut Suliffeqarnermullu Naalakkersuisoq)

**Siullermeerneqarnera**

Aallarniutigalugu Inatsisartunut ilaasortap Aqqaluk Heilmannip Atassummeersup aalajangiiffigisassatut siunnersuuteqarneranut Naalakkersuisut qutsavigaat.

Sermersuup aaneraneersunik sioqqanik seqummaarissunik, ilaatigut sioqqanik aammalu maskiinamik atuinani aammalu CO<sub>2</sub>-p pilersitarinnngisaanik sermersuup pilersitaanik qaarsunik seqummaarissunngortitsinerata kingunerisaanik, sermip aaneraneersunik qajuusaasannngorsimasunik, peqarfinni niuerneramik tunngaveqartumik periarfissat Naalakkersuisut sammivaat.

Kalaallit Nunaanni sioqqanik katersinissaq siunissamut takorluugaannaangilaq, kisianni aatsitassarsiorluni suliaavoq ingerlasoq. Suliffeqarfiit beton-imik tunisassiortut aammalu beton-imik nioqqutissianik kiisalu ujaraaqqanik, ujaqqanik aatsitassanillu assigisaannik Kalaallit Nunaanni aqqusinniormermit illuliortiternermilu atortussatut pilersuisut, ilaatigut sioqqanik katersinissaat aatsitassanut ikummatissanullu inatsimmi § 47 naapertorlugu, Naalakkersuisut akuersissuteqarfigisareerpaat.

Tamatuma saniatigut kommunit Kalaallit Nunaanni atuinissaq siunertaralugu ingerlatanik taamaaqataannik suliaqarnissaat Aatsitassanut ikummatissanullu inatsimmi § 46 naapertorlugu Naalakkersuisut akuersinnaavaat. Pisuni marluusuni ilaatigut akuersissummik peqarnissaq piunasaqaataanani sioqqanik katersineq ingerlanneqarsinnaavoq, kisianni sioqqanik katersineq isumannaallisaaneq, peqqissuseq avatangiisillu eqqarsaatigalugu isumannaatsumik ingerlanneqartussaavoq.

Suliassami avammut nioqquteqarnissaq siunertaralugu sioqqanik katersiviusumi, aatsitassarsiorluni suliassatut nalinginnaasunut piunasaqaatit naammassineqarsimasussaapput. Tamatuma kingunerisaanik akuersisumik peqarnissaq aamma royalty-nik akiliinissaq, matusinissamullu pilersaarutit akuersissuteqarfigineqarnissaat, qularnaveeqqusiissummik toqqorsivimmiititsinissaq, ingerlatassanut akuersissuteqarnissaq, Avatangiisinut sunniutaasussanik nalilersuinerup (VVM) akuersissuteqarfigineqarnissaa, Inuiaqatigiinni piujuartussamik iluaqutaasumik sunniutaasussanik nalilersuinerup (VSB) akuersissuteqarfigineqarnissaa, tamanut ammasumik tusarniaanerit, tusarniaaneq pillugu nalunaarusiamik suliaqarnissaq kiisalu 'Impact Benefit Agreement' (IBA) isumaqatigiissutigineqarnissaa, piunasaqaataapput.

Paasissutissiissutigineqarsinnaavoq namminersorlutik suliaqartut sermip aanneraneersunik seqummaarissunik soqutiginnillutik takutereersimammassuk; aammalu Kalaallit Nunaanni aatsitassarsiorluni suliassat, sapinngisamik namminersortut aningaasaliinerinik aammalu akileraarutinit aningaasanik akuutitsinani annaasaqarsinnaanernik, aallaaveqartinneqartariaqartut, pingaartumik Naalakkersuisut politikkeraat.

Naalakkersuisut siunissami aatsitassarsiorluni suliassanut periarfissanik aallarniutaasunik De Nationale Geologiske Undersøgelser for Danmark og Grønland (GEUS) suleqatigalugu nalilersuipput. Tamanna tunngavigalugu sermip aanneraneersunik seqummaarissunik, soorlu assersuutigalugu sioqqanik, katersinissamut periarfissanik misissuinissaq Naalakkersuisut kissaatigaat. Misissuineq assersuutigalugu nunap sannaanut, piiaanermi periaatsinut, sioqqanik katersinermi avammullu nioqquteqarnermi assartuussinermut aningaasartuutitut aamma imminut akilersinnaassutsimut tunngasunik imaqarsinnaavoq. Aammattaaq misissuinerup avatangiisinut tunngasut aalajangersakkallu attuumassuteqartut tamarmik nassuiaataannik imaqarnissaa naleqquttoq Naalakkersuisut isumaqarput.

Kisiannili Naalakkersuisut oqaatigisariaqarpaat, sioqqanik avammut nioqquteqarnissaq siunertaralugu iliuusissanut pilersaarummik suliaqarneq ukioq manna aallartinneqarsinnaanngimmat, tamannalu UPA2020-mut iliuusissanut pilersaarut naammassineqassappat, pisariaqarpoq. Tamatumunnga pissutaavoq isumalluutit pisariaqartut 2019-imut suliassanut allanut atugassanngortinneqarnerat. Kisiannili 2020-imi aallartittumik iliuusissanut pilersaarutip suliarineqarnissaanut aammalu UKA 2020-mut naammassineqarnissaanut pilersaarusiornissaq missingersuusiornissarlu Naalakkersuisut kissaatigaat.

Tamanna tunngavigalugu Naalakkersuisut inassutigaa Inatsisartut siunnersuut ilusimisit iluseqartillugu tapersissanngikkaat.

Tamatumunnga taarsiullugu Naalakkersuisut allannguutissatut siunnersuut manna saqqummiuppaat:

**Sioqqanik avammut nioqquteqaratarsinnaanissamut iliuusissanut pilersaarummik Naalakkersuisut UKA 2020-mut saqqummiusseqqullugu peqquneqarnissaat pillugu Inatsisartut aalajangiiffigisassaattut siunnersuut.**